

# APERET A PROJÈCTES DE SOSTIEN A LA TRANSMISSION E DE LA VALORIZACION DE LA LENGA NOSTA 2018

## REGLAMENT

### I. Contèxte e objectius de l'aperet a projèctes

Lo beròi succès e la mobilizacion de la purmèra edicion de la Passem que permetón a l'associacion Ligams de collectar 40 000 €. Aquera moneda que serà distribuïda a projèctes collectius tà la **transmission e la valorizacion de la lenga nosta**. L'aperet a projèctes que visa a :

- **facilitar l'emergéncia e/o l'experimentacion d'accions navèras, d'activitats qui responen a l'objectiu de transmèter la lenga nosta,**
- **sostièner lo desvelopament, l'estructuracion e la consolidacion de las accions en direccion de la transmission e/o de la valorizacion de la lenga,**
- **favorizar la mesa en hialat, valorizar e ahortir lo tribalh de partenariat, lo tribalh en comun deus diferents actors.**

La lenga nosta n'ei pas un simbèu, qu'ei emplegada dens lo quadre deu projècte.

### II. Candidats autorizats e beneficiaris

Los candidats autorizats a presentar un dossièr que son las associacions depausadas e las enterpresas de but non lucratiu.

Los projèctes que deven beneficiar au mensh a las personas qui demoran en Biarn e Baish-Ador.

### III. Retirar e depausar un dossièr de candidatura

Lo portaire deu projècte que deu completar un dossièr de candidatura telecargader suu site internet de l'associacion Ligams (<http://lapassem.com>).

Tà aver un dossièr complet que cau :

- lo dossièr de candidatura "Aperet a projèctes de sostien a la transmission e de la valorizacion de la lenga nosta 2018" completat,
- un budget previsionau de l'accion establìt sus 12 mes maximum (cf. modèl),
- los bilanç e compte de resultat de l'annada N-1, datats e signats per lo president o lo gerent,
- los estatuts de l'associacion, datats e signats per lo president o lo gerent,
- la copia deu rebut de la declaracion en prefectura,
- lo certificat d'inscripcion au repertòri deus establiments (SIRET),
- un relhevat d'identitat bancària de l'estructura,
- lo projècte d'establiment o lo projècte associatiu,
- tot document complementari qui permeti de valorizar l'accion e lo projècte de transmission de la lenga nosta.

Aqueth dossièr de candidatura que deverà har mensh de 8 paginas (shens los annèx). Que serà transmetut au mei tard lo **diluns 8 d'octobre de 2018** :

- sii per corric a [ligamsligams@gmail.com](mailto:ligamsligams@gmail.com)
- sii per corrièr a Associacion Ligams, 46 baloard Alsace Lorraine, 64 000 PAU

## IV. Modalitats d'instruccion

### 1. Condiçions d'eligibilitat

Las iniciativas que pòden concernir tots los domènis d'activitat e tots los publics qui an per objectiu e finalitat de transmèter e/o valorizar la lenga nosta. Aqueth aperet a projèctes qu'ei concebut com un utís d'amorsatge e de desvolopament, que deu veicular un imatge positiu virat cap a l'avièner shens crear divisions.

La realitat de la transmission e/o de la valorizacion de la lenga nosta perpausada que serà analizada d'après critèris d'apreciacion ligats **au contèxte de l'iniciativa** (lòc, besonh/aspiracions socials, ciblas, vision de long tèrmi), **a la soa dinamica collectiva** (qualitat deus partenariats botats en òbra, ancratge territorial, participacion activa de las partidas prenentats de qui los beneficiaris, governança collectiva), **aus resultats esperats e aus sons impacts**.

Un grasilha de repèris dab 12 critèris, presentats a la fin d'aqueth reglament, que guidarà la lectura collectiva e la causida de las accions qui seràn perpausadas dens l'aperet a projèctes.

Qu'esperam donc ua presentacion precisa deu projècte, de las soas modalitats d'evaluacion e de las perspectives de desvolopament.

Los projèctes qui non responen pas a las condicions d'eligibilitat que seràn deishats de costat.

### 2. Procèssus de seleccion de las candidaturas

Los dossièrs de candidatura que seràn analizats per un comitat de seleccion hèit de membres deu Conselh d'Administracion e de benevòles, puish presentats a l'Assemblada Generau de Ligams au mes de noveme de 2018 qui arrestarà la causida finau.

Los resultats que seràn notificats per corric après l'Assemblada Generau decisionària.

Tà l'edicion 2018, Ligams que desira ciblar la soa participacion e sustièner vertadèrament los projèctes retienguts. Pr'amor d'açò, 2 a 5 projèctes maximum que seràn retienguts.

Lo comitat de seleccion que retienerà projèctes situats sus au mensh duas zònas geograficas diferentas (en Biarn e Baish-Ador), o projèctes de dimension territoriala.

### 3. Modalitats de l'ajuda

L'ajuda dada que serà de 50 % deu còst deu projècte au maximum.

Lo comitat de seleccion qu'apreciarà la destinacion de l'ajuda financiara demandada e que's reservarà la possibilitat de modificar l'assieta deu projècte.

Si lo budget deu projècte ne passa pas los 3 000 €, l'associacion Ligams que darà la subvencion totau au començar deu projècte atestat per deliberacion deu CA de l'organisme portaire deu projècte.

Si lo budget passa los 3 000 €, l'associacion Ligams que darà la moneda en dus còps :

- un purmèr pagament de 60 % de l'ajuda au mei lèu a comptar de la notificacion d'atribucion de la subvencion,
- lo pagament de la demora après transmission d'un bilanç finau de l'accion.

Si lo projècte n'ei pas estat realizat o si la soa realizacion ei tròp diferenta deu projècte iniciaument presentat, lo pagament de la sobra que serà reconsiderat. Que pòt quitament estar demandat la restitucion deu purmèr pagament. Las somas non dadas o repesas que seràn reafectadas au pagament deus projèctes retienguts tà la Passem a vièner.

Lo projècte qu'a d'estar realizat e la subvencion dada abans lo **31 de mai de 2020**.

L'associacion Ligams que comunicarà sus los projèctes elegits d'aqueth aperet a projèctes.

### V. Contacte

Per tota informacion mei, contactar l'associacion Ligams per corric :

[ligamsligams@gmail.com](mailto:ligamsligams@gmail.com)

### VI. Grasilha referéncia de caracterizacion de la transmission de la lenga nosta

FINALITAT

N° 1	Lo projècte e respon a un besonh suu territòri d'implantacion ? Aqueth besonh n'ei pas o pas briga cobèrt suu territòri concernit ?
N° 2	Lo contèxte globau d'emergéncia deu projècte ei clarament explicitat ?
N° 3	Lo projècte e respon a l'exigéncia de transmission e/o de valorizacion de la lenga ? Lo projècte de transmission/valorizacion ei clarament explicitat ?

N° 4	Lo projècte e genèra d'autres efèits positius (impactes economics, enviroamentaus, societaus o sociaus) ?
N° 5	Lo projècte ei redigit en lenga nosta (grafia normalizada emplegada per l'Educacion Nacionau) ?

#### IMPLICACION DEUS ACTORS CONCERNITS PER LO BESONH

N° 6	Los beneficiaris mirats e las autas partidas prenentas, publicas e privadas, deu territòri d'implantacion e son implicats (dens l'identificacion deu besonh e/o dens la co-construccion de la responsa e/o dens la mesa en òbra operacionau deu projècte) ?
N° 7	Partenariats e son mobilizats e desvelopats ?

#### NAUTATS, EXPERIMENTACIONS, DESVELOPAMENT

N° 8	Lo projècte ei ua responsa navèra o significativament distincta de las solucions disponiblas suu territòri d'implantacion ? Se s'inspira de projèctes qui existeishen sus d'autres territòris, e s'adapta aus besonhs ?  O  Lo projècte e permet d'estructurar accions qui existeishen e de las desvelopar ?
------	--

#### VISION ESTRATEGICA

N° 9	La pertinéncia de la responsa portada e l'impacte deu projècte sus lo besonh identificat e son evaluats (utís e indicators quantitativs e qualitativs) ?
N°10	Lo projècte e s'inscriu dens lo long tèrmi (qualitat deu plan d'accion, credibilitat de la proposicion, responsa duradissa a besonhs sociaus o societaus) ?
N°11	Lo modèle economic deu projècte ei vededer ?
N°12	Lo projècte a vocacion a cambiar d'escala e/o a inspirar projèctes navèths sus d'autres territòris ?